



Selasa, 10 Desember 2024

Ogen: Lukas 7:38,45



Ngema Nahe Jesus



Keteheh ate i bas pusuh manusia megati icidahken arah erbage cara. Lit sada ende-enden Karo nina 'oh bulan-bulanna si macem-macem, i datas ture kundul aku janah rende, ku endeken ateku tedeh man mama Karo.....' Bagenda me nai kalak rende nuriken atena tedeh. Melala cara ras alat ibahan sekalak jelma ncidahken ras nambari atena tedeh.

Bagenda me sekalak diberu i bas teks enda nuriken keleng ate ras tedeh atena nandangi perhatin ras pengalemi dosa. Ietehna kal ise ia ras kuga geluhna dengen mulai enggo itandaina Jesus si terberita e. Erkiteken sie kerehenna ndahi Jesus la terjeng jumpa, tapi icidahkenna 'penyesalen' dirina bagepe kehamatenna man Jesus. Alu la ngerana, ia bertindak, tedis ia ipudi Jesus deher nahena janahna ngandung. Iuhna tanda penyesalen si mbages, reh i bas pusuhna nari. La lit angin la lit kata nibelas tentuna i bas pusuhna si ngerana, atena ngelakoken si banci ras ngasup ilakokenna. Deher nahe Jesus icibalkenna dirina, tandana la metunggung, litap nahe Jesus ibahan iluhna. Ibersihkenna, isapuina alu bukna janah iemana nahe Jesus dengen iminakina alu minak si merim. Iergaken Jesus kai si ibahanna e, emaka tupung ipandang kalak si nterem Jesus, ibahan Jesus perumpaman dengen arah e nina Jesus man Simon, si mada jabu, ia pe la iemana Jesus paksa ngalo-ngalo sedangken diberu e Jesus pe la iemana. Singatakenca bageme ia ngataken bujur man Jesus. Kuga kita ngataken bujur man Dibata i bas perbahanenna ngalemi kita? Banci labo seri si arus silakoken tapi makna silakoken kita e tuhu-tuhu alu dem kiniteruken ukur mpermultiaken Dibata. Erbage-bage bentuk pelayanen si bahan ras si buat baginta. Enda kerina jadi dalanta ngataken bujur man Dibata i bas perbahanenna, ngaloken ras ngalemi kita i bas salah dosanta.

➤ Sidadahken pengakun dosanta arah kininggiten ngelai Jesus